

UDUOK-MMQÑ YE EDIDOMO JESUS

Matthew 3:13-17; 4:1-11; Luke 4:14-32

QYQHỌ UKPEP-ÑKPỌ 17 – Eke Mkpawara

IKỌ IBUOT: “Eñwana ye Satan, ndien enye eyefehe ọkpọñ mbufo” (James 4:7).

Eyen-Erọñ Abasi

“Sese, Eyen-erọñ Abasi emi emende mme idiok-ñkpọ ererimbot efep” (John 1:29)! Emi edi mme odu-uwem ikọ emi John akadade ayarare Christ ye utom Esie emi adade emana mfọn edi.

Ata akwa otu owo ema eda ndikop Ukwọrọ-ikọ John, enye ama onyūñ onim ediwak owo emi ekekabarede esit baptism ke Akpa Jordan. Usen kiet, enye ama okut owo emi enye akanam mikwe ke otu owo. Jesus ekedi man enim enye uduok-mmọñ! Se nte esit ekenemde John ke ini enye okokutde Eyen Abasi! John ama ọkwọrọ ọnọ mme owo ete ke Enye emi okponde akan imọ enyene ndidi, ndien idahemi Enye odu mi!

Ama otuk John ke esit nte ke imọ idotke ndinim Jesus uduok-mmọñ, edi ke uyo Jesus, mmọ mbiba ema esaña eduk ke mmọñ “ndinam kpukpru nti ido.” John ekesimama ndinam uyo Christ kpukpru ini koro enye ọkọfiokde ete Jesus edi Eyen Abasi. Nte nnyin ikpepde ukpep-ñkpọ emi, imokut nte Abasi ọkọsọñode akpanikọ emi ọnọ John.

John ama onim Jesus uduok-mmọñ kpa nte enye okonimde mmọ efen, edi ke ini Jesus ọwọrọde ke mmọñ, ñkpọ ama otibe emi akananam mitibeke. Spirit Abasi ama ọsuhọre ke mbiet ibiom edidoro Enye ke idem, ndien ema ekop uyo otode ke enyọñ ọdọhọde ete, “Emi edi edima Eyen Mi, emi esit enemde Mi eti-eti ye Enye” (Matthew 3:17). Afo ekpekere ete ke akpakana nte kpukpru owo enyime enyūñ enim Jesus ke akpanikọ ke ini mmọ ekekopde uyo Abasi enyūñ ekutde Ibiom oro; edi idighe kpukpru ekenyene esit akpanikọ.

John ekedi anditiñ ntiñ-nnim ikọ, Abasi ama onyūñ etiñ ọnọ enye ete, Enye emi enye edikutde nte Spirit ọsuhọrede edidoro onyūñ odude ye enye edidi Andinyaña. John ye mbet esie ema edu do ke ini ñkpọ emi okotibede; mmọ ema ekut enyūñ enim ke akpanikọ. John ọdọhọ ete, “Ami mma nnyūñ ñkut, nnyūñ ntiense nte, Emi edi Eyen Abasi” (John 1:34).

Edisana Abasi Ita Ke Kiet

Nnyin imenyene ata ediye ndise ndiwut Abasi Ita ke kiet ke ukpep-ñkpọ emi, oro edi Owo ita emi enamde mbuot Abasi Kiet. Abasi Ete etiñ ikọ oto ke Obio Abasi ọnọ Abasi Eyen emi ọkọwọrọde ke mmọñ edi, ke ini emi Abasi Edisana Spirit ọsuhọrede nte ibiom edidoro Jesus ke idem. Ke akade iso, Jesus okot Edisana Spirit, Iberedem, onyūñ ọñwọñọ ete ke Imọ ima inyọñ, Iberedem eyedi ediduñ ye mmọ. Jesus okonyūñ okot Edisana Spirit emi ete, Spirit Akpanikọ emi edidade mme anditiene Enye usuñ oduk ke ofuri akpanikọ.

Spirit oro ofure ido nte ibiom. Enye ididukke ke esit emi misanake. Edi edieke nnyin iyereke ke Iyip Jesus, nnyin ñko, imekeme ndibọ Enye. Ke ini Enye odukde edi, esit nnyin eyeyọhọ ye akwa ima ye idara ukem nte se idude ke esit Jesus. Edisana Spirit edi Owo, ndien Enye edi kiet ye Jesus. Enye odu kpasuk ke esit owo emi Jesus odude.

Idomo Usen Aba

Okposuk edi nte Spirit ama ọkọsuhọre edidoro Jesus, Enye ikebeñeke idem nditoñọ utom Esie ke ndo-ndo oro. Ini idomo ama odu ke iso ọnọ Enye. “Koro sia Enye okokopde ndutuhọ ke edikut idomo, Enye ekeme ndinyaña mmọ emi edude ke idomo” (Mme Hebrew 2:18).

Owo ekededi emi oyomde ndinam utom nnọ Abasi enyene ndisaña mbe ke ini idomo. Jehovah oyom ndidomo nnyūñ nse mme nnyin imeneñere ibiere, ke ini idọhọde Enye ite “iyeka kpukpru ebiet emi edọhọde ika” iyenyūñ inam kpukpru ñkpọ eke Enye edidọhọde nnyin inam.

Spirit ama ada Christ aka ke wilderness, emi Enye okodude ikpọñ ke usen aba ye mme unam ikọt inyūñ idiaha baba ñkpọ kiet. Edi akpanikọ nte ke biọñ ama ọdọñ Enye ke anyan ini utre udia oro ama ekebe, ndien Satan ekekere ete: Emi edi ifet mi. Ke ini oro, se ikadade mmem-idem inọ Jesus ekedi biọñ, do ke andidiok ọkọdọhọ Enye ete edieke Enye edide Eyen Abasi ke akpanikọ akpana Enye anam mme itiat ekabare uyo man Enye ata. Ekpedi mmem-mem ñkpọ ọnọ Jesus ndikpanam mme itiat ekabare edi uyo, koro Jesus ekeme ndinam kpukpru ñkpọ. Edi Enye ikenyeneke udọñ ndinam item andidomo Enye.

Ofut Spirit-Ikọ Abasi

Jesus okowut nnyin nte ikpañwanade ye andidiok. Ke ini Satan okoyomde Enye anam uyo, Christ etiñ Ikọ Abasi onọ enye. Ke ediwak isua emi ebede, Moses ama etiñ onọ Nditọ Israel ete, “Idige uyo ikpoñikpoñ ke owo ada odu uwem, ke edi kpukpru se itode Jehovah ke inua” (Deuteronomy 8:3). Edieke nnyin ifiokde Ikọ Abasi, imekeme ndiboro andidiok ke ukem usuñ oro ke ini enye adade idomo edi. Edi ata akpan-ñkpọ nnyin ndikpep Edisana Nwede Abasi nnyuñ mfiok mme eñwoñọ emi Abasi oñwoñode onọ nnyin.

Okposuk edi nte Satan mikekanke Jesus ke ekon kiet, enye iketereke do. Enye ototo nta ada Jesus aka ke enyon Itie-ukpono Abasi ke Jerusalem onyūñ odoto Enye oto do ofro oduo ke ison. Enye ete edieke Jesus edide ata Eyen Abasi ke akpaniko, Ete esie idiyakke Enye ada unan. Enye (Satan) ama ofiok ete ke David ama etetiñ abana Jesus ete ke mme Angel eyekpeme Enye man Enye okutuaha ukot Esie ke itiat (Psalm 91:12). Jesus ama ofiok Ikọ Abasi oro nko, edi Enye ama ofiok akan oro. Enye ama ototo nta ada Ikọ Abasi oboro ete: “Kudomo Jehovah Abasi fo.”

Kpa ye oro, Satan ikokpoñke-kpoñ Jesus. Tutu nnyin ikpoñ ererimbot emi, asua ukpoñ nnyin iditreke ndisuk nkaka iso nyom usuñ ndiwonore nnyin nsio ke nditiene Abasi. Edi Jesus ama okut idomo ke kpukpru usuñ kpa nte nnyin, Enye nko onwoñọ ndiñwam nnyin ndikan kpukpru idomo ekededi edieke nnyin iyomde unwam ito Enye.

Satan ama ada Jesus aka ke ata akamba edikon obot, ebiet emi etimde ekut kpukpru una-ison ye ubon ererimbot. Andidiok ama ofiok ete ke ediwak owo eyenyam ukpoñ mmọ man enyene inyene ye odudu, ndien enye okoyom ndise me Jesus eyenam nte. Edi ikedighe ini Jesus ndikara nte edidem ke ererimbot emi, ke ebede oro, ini ama ekem, idighe Satan edinọ, edi Abasi edinọ Enye odudu ndikara.

Andidiok ama enyene uko ndidoto Jesus onuhoto atuk ibuo onọ imo. Nnyin ikpamaha ndikut nte baba owo kiet atukde ibuo onọ andidiok; edi ediwak owo ke mme esen idut, kpa ye ke idem idut nnyin emi, etetuak ibuo, onyūñ ebọ mme itie ukpono eno enye. Ndusuk ini, mmọ ekam ewawa ndito mmọ eno andidiok. Edi Jesus odoto ete, “Tuak ibuo no Jehovah Abasi fo, nyuñ nam ñkpọ no Enye ikpoñ-ikpoñ.”

Andikan

Ke kpukpru mme idomo oro ema ekebe, Jesus ama okop mmem-idem eti eti, edi Enye ama enyene erikan. Abasi ama etiñ ke ini emi Jesus akanade uduok-mmọ ete ke Imo imenem esit eti eti ye Eyen Imo, edi Enye ekenem esit adana didie ke ini Enye okokutde nte Andinyaña nnyin akande andidiok ofuri ofuri. Enye ama onọ angel edi edinam ñkpọ onọ Enye onyūñ osoto Enye idem. Abasi enem esit ye ndito Esie nko ke ini mmọ ekande andidiok, Enye onyūñ odoto mme nti eridion nte utip onọ mmọ.

MME MBUME

1. Nte John ama ekere ete ke imo imodot ndinim Jesus uduok-mmọ?
2. Nte afo emekere ete ke John ama okut Jesus mbemiso Jesus edina uduok-mmọ?
3. Anie ekedi Enye emi okosuhorede odoro Jesus ke idem ke mbiet ibiom?
4. Nte emekere ete ke Jesus akpakanam mme itiat ekabare edi uyo?
5. Ke ini Jesus okodoto ete: “Daha mi ke usuñ Satan. . .” nnyin ikot ite ke andidiok ama adaha okpoñ Enye. Nso ukpep-ñkpọ ke emi ekpep nnyin?
6. Nso isitibe kpukpru ini emi owo etienede onyūñ anamde item Satan?